

**U ovom broju, između ostalog, čitajte:**

- **UPFBiH i predstavnici 19 sindikata iz realnog sektora uputili pismo Vladi FBiH i traže izjašnjenje o ustavnosti Zakona o minimalnoj plaći**
- **Na inicijativu UPFBiH, Dom naroda PFBiH usvojio izmjene Zakona o cestovnom prevozu**
- **Sastanak u vezi nemogućnosti aneksiranja raskida ugovora potpisanih u postupku javne nabavke uslijed enormno poskupljenja**
- **O minimalnoj plaći predstavnici UPFBiH razgovarali sa premijerom Vlade FBiH, ministrom Drljačom i predstavnicima SDP-a**
- **Direktor UPFBiH i predsjednik Sindikata metala o izmjenama KU za djelatnost prerade metala**
- **Na inicijativu UPFBiH privrednicima ukinut parafiskalni namet za općekorisne funkcije šuma**



## UPFBiH i predstavnici 19 sindikata iz realnog sektora uputili pismo Vladi FBiH i traže izjašnjenje o ustavnosti Zakona o minimalnoj plaći

**Traže očitovanje o uočenim problemima u tekstu Zakona, čije posljedice u praksi mogu biti pogubne**

Udruženje poslodavaca Federacije Bosne i Hercegovine i predstavnici 19 sindikata iz realnog sektora uputili su pismo Vladi Federacije BiH u kojem traže izjašnjenje o ustavnoj utemeljenosti Zakona o minimalnoj plaći FBiH kojeg je predložilo Federalno ministarstvo finansija.

Predstavnici Udruženja poslodavaca FBiH i 19 granskih sindikata koji su članovi sindikalne delegacije u Ekonomsko-socijalnom vijeću za teritoriju Federacije BiH saglasni su da je potrebno hitno povećanje ne samo minimalne, nego i svih drugih plaća u Federaciji Bosne i Hercegovine.



Međutim, obje delegacije imaju niz pitanja u vezi sa predloženim Zakonom o minimalnoj plaći koji je upućen ESV FBiH te su zato uputili zajedničko pismo Vladi i Parlamentu FBiH u kojem se traži očitovanje o uočenim problemima u tekstu Zakona, čije posljedice u praksi mogu biti pogubne.



U pismu upućenom Vladi FBiH predstavnici UPFBiH i 19 sindikata iz realnog sektora postavili su pet pitanja na koja očekuju izjašnjenje u što skorijem roku.

**Pitanja na koja traženje izjašnjenje su:**

- 1. Da li postoji ustavna nadležnost Vlade Federacije BiH da predlaže, a Parlamenta Federacije BiH da usvoji Zakon o minimalnoj plaći ?**
- 2. Da li je ovaj zakon sačinjen u skladu sa Zakonom o federalnim ministarstvima i drugim tijelima federalne uprave ("Službene novine Federacije BiH" br. 58/02, 19/03, 38/05, 2/06, 8/06 i 61/06)?**
- 3. Da li je ovaj zakon usklađen sa Konvencijom MOR-a o određivanju minimalne plate br. 131. ?**
- 4. Da li je ovaj zakon usklađen sa pojedinim odredbama Zakona o radu, Zakona o doprinosima, Zakona o porezu na dohodak i drugim zakonima?**
- 5. Kakva će biti sudbina važećih kolektivnih ugovora?**

## Na inicijativu UPFBiH, Dom naroda PFBiH usvojio izmjene Zakona o cestovnom prevozu



Delegati Doma naroda Parlamenta FBiH usvojili su 26. maja 2022. godine po hitnom postupku Zakon o izmjenama i dopunama Zakona o cestovnom prijevozu FBiH.

Izmjenama se uvodi mogućnost da osobe sa završenom srednjom školom i položenim vozačkim ispitom odgovarajuće kategorije mogu konkurisati za radna mjesta vozača. U dosadašnjoj legislativi, uslovi su bili strožiji u pogledu potrebnog stepena stručne spreme kandidata.

Udruženje poslodavaca FBiH je 2018. godine pokrenulo inicijativu za izmjenu ovog zakona, navodeći da je biti vozač vještina, a ne zanimanje, te da su odredbe pogodovala samo privatnim firmama koje naplaćuju izdavanje diploma za vozače.

Izmjenom zakona obezbijedit će se ambijent u kojem se privrednim društvima omogućava normalan rad i funkcioniranje, a mladim ljudima koji imaju završenu srednju školu i položen vozački ispit za odgovarajuću kategoriju vozila pomoći da lakše dođu do zaposlenja. Nova zapošljavanja ujedno dovode i do punjenja budžeta i vanbudžetskih fondova.

## Sastanak u vezi nemogućnosti aneksiranja raskida ugovora potpisanih u postupku javne nabavke uslijed enormno poskupljenja

**Usaglašeno je da se hitno treba pristupiti izmjeni člana 72. čijim izmjenama će se definisati mogućnost izmjena ugovora uslijed nepredviđenih okolnosti**



Predstavnici UPFBiH održali su 17. maja 2022. godine sastanak sa direktorom Agencije za javne nabavke BiH Tarikom Rahićem a kako bi razgovarali o problemima u vezi nemogućnosti aneksiranja raskida ugovora potpisanih u postupku javne nabavke, uslijed enormnog poskupljenja sirovine, energije i slično.

Na sastanku je dogovoreno da se poslodavci bliže upoznaju sa članom 72. Zakona o javnim nabavkama BiH. Također je dogovoreno da će se u narednom periodu održati webinar na kojima će predstavnici Agencije upoznati poslodavce sa institutom indeksacije cijena te da će na web stranici Agencije biti objavljeno tumačenje ovog člana.

Usaglašeno je da se hitno treba pristupiti izmjeni člana 72. čijim izmjenama će se definisati mogućnost izmjena ugovora uslijed nepredviđenih okolnosti, te da ukoliko do toga ne može doći u parlamentarnoj proceduri, izmjene treba proglasiti Visoki predstavnik u BiH.

## Delegacija UPFBiH na sastanku sa premijerom Vlade FBiH

Delegacija UPFBiH održala je sastanak sa premijerom Vlade FBiH Fadilom Novalićem na kojem se razgovaralo o Prijedlogu zakona o minimalnoj plaći, Zakonu o doprinosima, Zakonu o porez na dohodak, Zakonu o porezu na dobit te Zakonu o zdravstvenom osiguranju.



Na sastanku je dogovoreno da se razmijene tekstovi propisa te da se tokom iduće sedmice zakaže sjednica Ekonomsko-socijalnog vijeća FBiH.

## UPFBiH i ministar Drljača o minimalnoj plaći

Predstavnici UPFBiH održali su sastanak sa ministrom rada i socijalne politike FBiH Veskom Drljačom na kojem su razgovarali o Prijedlogu zakona o minimalnoj plaći koje je predložilo Ministar finansija FBiH.

Udruženje poslodavaca je, zajedno sa 19 sindikata iz realnog sektora, ranije uputilo Vladi FBiH pismo u kojem se traži izjašnjenje o ustavnoj utemeljenost ovog zakona.

Predstavnici UPFBiH podsjetili su da se traži očitovanje o uočenim problemima u tekstu Zakona, čije posljedice u praksi mogu biti pogubne te da je zajedničko stajalište UPFBiH i sindikata da je neophodno što prije smanjiti opterećenje cijene rade, jer se upravo tu nalazi najveća rezerva za povećanje minimalne plaće u FBiH.



## **Direktor UPFBiH i predsjednik Sindikata metala o izmjenama KU za djelatnost prerade metala**

### **Predloženo otvaranje pregovara oko izmjene Kolektivnog ugovora**

Direktor Udruženja poslodavaca Federacije Bosne i Hercegovine održao je 27. maja 2022. godine sastanak sa predsjednikom i potpredsjednikom Sindikata metalaca FBiH Bajrom Melezom i Almirom Salihovićem.

Na sastanku je razgovarano o Kolektivnom ugovoru o pravima i obavezama poslodavaca i radnika za djelatnost i prerade metala u FBiH koji ističe početkom augusta tekuće godine.



Predloženo je otvaranje pregovara oko izmjene Kolektivnog ugovora, te je dogovoreno da će obje delegacije dostaviti prijedloge izmjena.

## Minimalna plaća tema sastanka predstavnika UPFBiH i SDP-a



Predstavnici Udruženja poslodavaca Federacije Bosne i Hercegovin održali su 26. maja 2022. godine sastanak sa predsjednikom Kluba zastupnika u Zastupničkom domu Parlamenta Federacije Bosne i Hercegovine Damirom Mašićem i delegatom Doma naroda PFBiH Anerom Žuljevićem.

Na sastanku je razgovarano o Prijedlogu zakona o minimalnoj plaći koji je predložio Klub SDP-a, a koji se nalazi u parlamentarnoj proceduri te su obje delegacije obrazložile svoje prijedloge na pomenuti prijedlog.

Predstavnici UPFBiH upozorili su na probleme koji se mogu desiti ukoliko se prijedlog usvoji u izvornom tekstu te iznijeli svoje prijedloge na Zakon.

Nakon diskusije, delegacije su poprilično približile stavove o Prijedlogu zakona o minimalnoj plaći.




## Fokus grupa o organizaciji UPFBiH



Fokus grupa o organizaciji Udruženja poslodavaca Federacije Bosne i Hercegovine održana je 09. maja 2022. godine s ciljem boljeg razumijevanja prilika, prijetnji, snaga i slabosti Udruženja, internog i eksternog okruženja te definisanja strateških ciljeva i planova za njihovu implementaciju.

U fokus grupi su, pored rukovodstva i pojedinih članova UPFBiH, učestvovali i profesori Željko Šain, Ljiljan Veselinović i Aziz Šunje.



Članovi su razmijenili mišljenje o izazovima sa kojima se UPFBiH suočava u svom radu te načinu prevazilaženja tih prepreka, te na koji način unaprijediti rad Udruženja, odnosno usluga koje Udruženje nudi.

Profesori će na osnovu inputa dobivenih na fokus grupi sačiniti analizu i napraviti dokument koji će razmotriti Udruženje.

## Predstavници UPFBiH i IOM-a o mijenjanju legislative o zapošljavanju stranaca i uvozu nedostajuće radne snage



Predstavnici Međunarodne organizacije za migracije (IOM) predstavili su predsjedniku i direktoru UPFBiH Adnanu Smailbegoviću i Mladenu Pandureviću istraživanje U posljednjih nekoliko godina Bosna i Hercegovina se suočava sa iseljavanjem stanovništva neviđenih razmjera što predstavlja veliki problem za državu, ali i poslodavce. Međunarodna organizacija za migracije (IOM) je napravila istraživanje iseljavanja zdravstvenih radnika i stručnjaka iz oblasti informaciono-komunikacijskih tehnologija koje su predstavili rukovodstvu UPFBiH na sastanku održanom 27. maja 2022. godine.

Predstavnici IOM-a su istakli da su ova dva sektora prepoznati kao posebno pogođeni odlivom mozgova te da se smatraju ključnim za privredu Bosne i Hercegovine jer je zdravstveni sektor zadužen za brigu o zdravlju ljudskog kapitala čitave privrede, dok je sektor IKT pokretač razvoja i rasta produktivnosti svih drugih sektora privrede kroz tranziciju zasnovanu na tehnologiji.

"Upravo iz ovih razloga problem odliva mozgova potrebno je rješavati prvenstveno unutar ova dva sektora, zbog toga što će se učinak novih politika za rješavanje problema iseljavanja odraziti na čitavu privredu i sveukupni socioekonomski razvoj države" kazali su predstavnici IOM-a.

Predstavnici IOM-a zatražili su od UPFBiH informacije o ovoj temi te da se predlože načini komuniciranja o projektima koji su vezani za mijenjanje legislative o zapošljavanju stranaca i uvozu nedostajuće radne snage.

## Delegacija UPFBiH sa predstavnicima SDP-a




Na poziv predsjednika SDP-a BiH Nermina Nikšića, 20. maja 2022. godine održan je sastanak delegacije Udruženja poslodavaca FBiH i SDP-a.

Na sastanku je razgovarano o izradi Izbornog programa koji će poslužiti kao osnova djelovanja SDP-a BiH u iduće četiri godine.

S tim u vezi, predstavnici Udruženja poslodavaca su dali svoje sugestije i primjedbe na pomenuti dokument, s ciljem da se kreira dokument u kojem će biti predočena rješenja za unapređenja ukupnih društvenih prilika u svim ključnim oblastima javnog djelovanja.

Dogovoreno je da će do kraja mjeseca juna tekuće godine Udruženje poslodavaca FBiH dostaviti primjedbe na program, sa posebnim osvrtom na ekonomska pitanja.

## Održan prvi sastanak radne grupe Programa Garancije za mlade u BiH



Prvi pripremni sastanak radne grupe Programa Garancije za mlade u BiH, čiji je član i predstavnik UPFBiH, održan je 18. maja 2022. godine.

Garancija za mlade je provjeren, inkluzivan i ambiciozan program aktivacije koji države članice EU koriste od 2013. godine kako bi mladima osigurale nesmetan prelaz iz obrazovanja na posao, podržale njihovu integraciju na tržište rada i osigurale da nijedna mlada osoba ne bude izostavljena.

Cilj Garancije za mlade je smanjenje nezaposlenosti i neaktivnosti mladih. Njenim provođenjem, države članice EU obavezuju se da će osigurati da svi mladi dobiju kvalitetnu ponudu za zaposlenje, nastavak obrazovanja, učenje kroz rad ili stažiranje u roku od četiri mjeseca od ulaska u status nezaposlenosti ili napuštanja, odnosno završetka formalnog obrazovanja.

Na sastanku je istaknut značaj izrade kvalitetnog plana za provođenje programa Garancije za mlade, prezentovane ključne karakteristike, ciljevi radne grupe i naredne aktivnosti te dogovoreni zadaci učesnika radne grupe i okvirni termini narednih sastanaka.

## Na inicijativu UPKS, Općinsko vijeće Stari Grad Sarajevo umanjilo komunalne takse



Na inicijativu UPKS, Općinsko vijeće Stari Grad Sarajevo usvojilo je izmjene Odluke o komunalnim taksama čime su znatno umanjeni iznosi pravnim i fizičkim licima.

Izmjenama Odluke o komunalnim taksama fizičkim licima se takse umanjuju od 66 do 77%. Primjera radi, fizička lica koja su važećom odlukom trebala plaćati između 450-600 KM za poslovno sjedište, u zavisnosti od zone u kojoj se nalazi, novim izmjenama plaćat će od 100-200 KM, a za izdvojene poslovne jedinice od 40 do 100 KM, umjesto dosadašnjih 200 do 300 KM.

Mikro i mala pravna lica će za poslovno sjedište, u zavisnosti u kojoj zoni se nalazi, plaćati iznos od 100 do 500 KM, a za svaku poslovnu jedinicu će plaćati ovaj iznos umanjen za 70%. Srednja i velika pravna lica za poslovna sjedišta će plaćati od 400 do 2.000 KM, do pet poslovnih jedinica 70% manje od tog iznosa, a više od pet poslovnih jedinica 90% manje od navedenog iznosa.

Posebno se vodilo računa o starim tradicionalnim obrtima koji će sada plaćati od 20 do 40 KM godišnje, taksi prevoznici 30 KM godišnje, a domaća radinost 20 KM.

[Odluka o izmjenama i dopunama Odluke o visini komunalnih taksi Općine Stari Grad](#)

## Na inicijativu Udruženja poslodavaca FBiH privrednicima ukinut parafiskalni namet za općekorisne funkcije šuma



Na inicijativu Udruženja poslodavaca FBiH, Skupština Kantona Sarajevo je na sjednici održanoj 09.05.2022. godine donijela Zakon o izmjenama i dopunama zakona o šumama Kantona Sarajevo.

Zakon je usvojen na inicijativu Udruženje poslodavaca FBiH koja je pokrenuta još 2019. godine. UPFBiH je pokrenulo ovu inicijativu smatrajući da je ovo još jedan u nizu parafiskalnih nameta i opterećenja za poslodavce, te da opštekorisne funkcije šuma predstavljaju javno dobro od opšteg interesa za sve građane, a ne samo za poslodavce. Iz UPFBiH su izrazili nadu da će i ostali kantoni pratiti primjer Kantona Sarajavo i ukinuti ovaj ali i ostale namete koji su poseban teret u poslovanju i koji utiču na smanjenu konkurentnost domaće privrede.

"Ovim izmjenama konačno smo u potpunosti ukinuli parafiskalni namet privrednicima i ujedno su se i stekli uvjeti za realizaciju aktivnosti efikasnije zaštite šuma i šumskog zemljišta", istakao je ministar privrede KS Adnan Delić.

Kako bi se osiguralo finansiranje aktivnosti kojima je svrha zaštita i unapređenje stanja šuma i šumskog zemljišta predviđeno je da se za ove namjene, umjesto dosadašnjeg načina osiguranja sredstava kroz OKFŠ, isto osiguravaju iz Budžeta Kantona Sarajevo u rasponu od

0,5% do 2%, od poreznih i neporeznih prihoda u Budžetu za prethodnu godinu.

"Komparirajući prihode koji su ostvarivani po osnovu uplata naknada za općekorisne funkcije šuma, te predloženo izdvajanje novčanih sredstava iz Budžeta, zaključak je da je visina novčanih sredstava približno ista, što implicira da osiguranje sredstava neće biti upitna i da će se moći i dalje nesmetano finansirati aktivnosti kao što su izrada i revizija kantonalnog šumsko-razvojnog plana, izrada šumsko-privrednih osnova za državne i privatne šume, nadzor nad prikupljanjem podataka za izradu šumsko-privrednih osnova za državne i privatne šume, obnove šuma od posljedica elementarnih nepogoda, prenamnoženja insekata, požara i slično, unapređenje proizvodnje šumskog reprodukcionog materijala, očuvanje i unapređenje bioraznolikosti šumskih ekosistema, te aktivnosti iz proširene biološke reprodukcija šuma u obimu većem od onog koji je predviđen šumsko-privrednom osnovom", naveo je ministar Delić u izlaganju skupštinskim zastupnicima.



Novim zakonom ukida se parafiskalni namet privrednicima, unapređuje zaštita šuma i šumskog zemljišta kroz praktičniju organizaciju zaštite šuma i rigorozniju kaznenu politiku za prekršioce zakona; preciziraju se prava služnosti na šumskom zemljištu u državnom vlasništvu, jasnije definira šuma s posebnom namjenom, kao i postupak i nadležnosti za proglašenje šuma s posebnom namjenom, podizanje kvaliteta gospodarenja šumama u državnom vlasništvu, te ukidanje naknade vlasnicima privatnih šuma za troškove stručnih poslova koje obavlja Uprava za šumarstvo. Navedene izmjene, posebno one koje se odnose na regulisanje propisa vezanih za čuvanje šuma, trebale bi, osim boljeg gospodarenja šumama u državnom vlasništvu, potaknuti i vlasnike privatnih šuma na bolje gospodarenje šumama u privatnom vlasništvu.

## Održana sjednica Grupacije poslodavaca ZDK pri UPFBiH



Na sjednici Upravnog odbora Grupacije poslodavaca ZDK pri Udruženju poslodavaca Federacije Bosne i Hercegovine, održanoj 11. maja 2022. godine, donesena je odluka da se prema dostavljenom materiju krovne organizacije - Udruženja poslodavaca Federacije BiH, uputi poziv za delegiranje kandidata pojedinačnim i kolektivnim članicama Grupacije za izbor u organe i tijela Grupacije i UPFBiH.

Dostavljeno će se razmatrati na sljedećoj sjednici Upravnog odbora Grupacije kada će biti utvrđen datum održavanja Skupštine Grupacije poslodavaca ZDK pri UPFBiH.

Pod tačkom razno, član UO Vladimir Franjić istakao je da je jedan od prijedloga delegacije poslodavaca u ESV-u ZDK bio da se prilikom raspisivanja konkursa za dodjelu sredstava iz Budžeta Kantona obavezno uključe i poslodavci, što do sada nije bio slučaj.

Naglašeno je da je potrebno promijeniti šifre djelatnosti za konkurisanje, jer pojedine oblasti ostaju uskraćene za pomenuta sredstva upravo zbog šifri. Zaključeno je da će se do kraja oktobra napraviti prijedlog kriterija za donošenje Budžeta Kantona i da će se isti dostaviti ESV-u ZDK.



## Studijska posjeta o odgovornom oglašavanju i zaštiti brenda



Predstavnica UPFBiH Vedrana Živković učestvovala je u studijskoj posjeti Bratislavi koja je organizovana s ciljem daljeg rada na inicijativi za uključivanje biznis zajednice u borbu protiv dezinformacija i drugih online i digitalnih izazova koje ugrožavaju i same biznise, ali i cijelu medijsku scenu i ostale segmente društva na različite načine.

U Slovačkoj i Češkoj, jedinstveni projekat Konšpirátori.sk pokrenula je marketinška zajednica prije šest godina. To je javna baza podataka web stranica koje šire dezinformacije, podvale i propagandu. Konšpirátori.sk pomaže brendovima da ove web lokacije stave na crnu listu iz svojih reklamnih kampanja. Dakle, pomaže brendovima da zaštite svoju reputaciju i osigurava da se njihovi marketinški budžeti ne troše na sponzoriranje medija koji šire informacije.

Svrha ovog studijskog putovanja u Bratislavu je razmjena najbolje prakse te razmjenjivanje mišljenja o tome kako bi se slična inicijativa mogla uspostaviti na Balkanu.

Tokom posjete održano je niz posjeta, sastanaka i prezentacija s relevantnim osobama iz pomenute oblasti te je razgovarano o sigurnosti brenda i odgovornom oglašavanju.

Posjetu je organizovalo UG "Zašto ne" iz Sarajeva, u saradnji sa Centrom za demokratsku tranziciju iz Podgorice i Konspiratori.sk iz Bratislave, a uz pomoć Center za International Private Enterprise iz SAD-a, a učestvovali su predstavnici privrednih komora i udruženja poslodavaca iz Bosne i Hercegovine, Crne Gore i Srbije.

## UPKS pomaže opremanje Centra za rad za djecu sa poteškoćama u razvoju



Na poziv načelnika Općine Centar Srđana Mandića, predstavnici Udruženja poslodavaca Kantona Sarajevo održali su sastanak sa načelnikom i predsjednicom Udruženja za podršku porodicama sa djecom i osobama sa poteškoćama u razvoju "Colibri" Aidom Hrnjić. Sastanku su ispred Udruženja poslodavaca KS prisustvovali predsjednik Safudin Čengić, te članovi UO Igor Baroš i Suad Ećo.

Općina Centar je finansijski podržala rad Udruženja za podršku porodicama sa djecom i osobama sa poteškoćama u razvoju i ustupila prostor na korištenje na duži period. Međutim,



kako bi se prostor prilagodio i adekvatno opremio, odnosno prilagodio radu sa djecom sa poteškoćama u razvoju, neophodna su finansijska sredstva koja će obezbjediti članice Udruženja poslodavaca kao društveno odgovorne kompanije koje nesebično pomažu i sudjeluju u ovakvim i sličnim projektima.

Udruženje poslodavaca KS će pomoći u opremanju Centra za rad za djecu sa poteškoćama u razvoju i osigurati bolji i sretniji rad, kao i boravak članovima Udruženja.

Predstavnici Udruženja poslodavaca Kantona Sarajevo su odali priznanje načelniku Mandiću i predsjednici Udruženja na inicijativi i angažmanu kako bi se realizovao ovaj hvale vrijedan projekat i dala jednaka prilika za rast i učenje svoj djeci da lakše prevaziđu izazove sa kojima se



svakodnevno susreću kao i da se osigura lakši i sretniji boravak djece u novom Centru koji će zadovoljavati europske standarde.

"Nadamo se da ćemo na ovaj način barem malo pridonijeti buđenju socijalno društvene odgovornosti svakog pojedinca i pružiti podršku onima kojima je to najpotrebnije" istakli su predstavnici Udruženja poslodavaca KS.

U ovom Centru svaki radni dan od 9 do 17 sati u radu sa djecom sa poteškoćama u razvoju se potiču njihove adaptivne i socijalne sposobnosti i konceptualne vještine kroz edukativne i socijalne rehabilitacije korisnika. Također je u Centru uključeno redovno vježbanje s ciljem poboljšanja psiho-fizičkih funkcija, te razne terapije: logopedska, senzorske integracije, muzička, likovna, fizikalna, radna itd.

## Direktor UPFBiH na događaju FIFA World Cup Trophy Tour by Coca-Cola



Bosna i Hercegovina i Sarajevo su ugostili jedinstvenu svjetsku turneju - FIFA World Cup Trophy Tour by Coca-Cola, a Bosna i Hercegovina je prva europska zemlja na ovogodišnjoj turneji koja dočekuje FIFA World Cup Trophy. Direktor UPFBiH Mladen Pandurević, na poziv Coca-Cola HBC B-H d.o.o. Sarajevo, učestvovao je na ovom događaju.

Trofej Svjetskog prvenstva je bio izložen u sarajevskoj Vijećnici, dok je na platou prekoputa Vijećnice bili dostupan i Coca-Cola Corner s brojnim aktivacijskim programima koje su FIFA i Coca-Cola pripremili za bh. obožavatelje i obožavateljke nogometa.

”Čast mi je što smo imali priliku da ugostimo ovaj najznačajniji fudbalski simbol u našoj Vijećnici. Prava magija i prava pobjeda ovog izuzetnog projekta je broj mladih ljudi koji su u protekla dva dana došli u gradsku kuću. Želim da se posebno se zahvalim FIFA-i, Nogometnom savezu Bosne i Hercegovine i Coca-Coli, društveno odgovornoj kompaniji sa kojom sa zadovoljstvom sarađujemo na ovim važnim projektima”, istakla je gradonačelnica Sarajeva Benjamina Karić na završnom prijemu u Vijećnici.

U pratnji trofeja su bila dva ambasadora, nogometne legende – penzionisani proslavljeni brazilski nogometaš Gilberto Silva te bivši nogometaš, reprezentativac i selektor bh. reprezentacije Faruk Hadžibegić.

"Velika je čast biti u Sarajevu i BiH. Veoma sam emotivan što sam danas među svima vama. Došli smo kako bi vam podarili naše najbolje iskustvo i naša najljepša sjećanja kako bi inspirisali naredne generacije. Željeli smo donijeti trofej ovdje kako bi

inspirisali nove generacije i kako bi izgradili bolju budućnost za sve nas", rekao je Silva.



FIFA World Cup™ trofej bio je izložen 17. i 18.5. u sarajevskoj Vijećnici, čime se završila turneja u Sarajevu.



# UDRUŽENJE POSLODAVACA

---

**UDRUŽENJE POSLODAVACA FBiH**  
**MARŠALA TITA 6, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**